

Jahresbericht vom Tanze 2010

Scho ganz früh vom Jahr 2010 u zwar am 8. Januar si Brigitta Grünig, z'Vreni Widmer u Silvia Beyeler a ds erschte vo drüne Tanzleitertanze ga Tänz für z'Eigenössische Trachtefescht z'Schwyz übe.

Am Wuchenänd vom 16. u 17. Januar si 8 Tanzfroue, i ds Gwatt ga schnuppere u lehre, was i dr Voukstanzwäut Nöis isch usecho. Das isch immer äs sehr schöns Erläbnis.

Am 19. März si paar Tanzfroue nach Gasel ad d'DV vor Trachtevereinigung Landesteil Mittelland. Dert hetme ungerangerem viu wärtvou Informatione vom Trachtefescht z'Schwyz übercho.

Z'Regionauträge isch das Jahr am 9. April bir Trachtegruppe z'Mühleturte gsy. Dr Usstusch zwüsche de Tanzlüt isch immer sehr intressant u wärtvou.

Es isch dr 25. April wo di fuf Froue, Vreni Widmer, Silvia Beyeler, Lydia Fahrni, Kathrin Hirschi u ds Vreni Brönnimann am Morge bezyte uf Oberburg fahre. Dert findet hüt ds Bott vo dr Bärnische Trachtenvereinigung statt. Nachem Begrüessigskaffee mit Gipfeli cha dr Obmaa Heinz Wüthrich ds Bott eröffne. Ohni viu Diskussione si aui Traktande im Sinn vom Vorstand über d'Bühni gange. O hie wird ume z'Trachtefescht vo Schwyz besproche. Nacheme feine Mittagässe, bi wunderschönem Wätter, wird dusse ufem Rasse mit viu Härzbluät tanzet.

Das Jahr hei vier Tanzfroue ou ume am festleche Tanzabe im Casiono z'Bärn teilgno. Zur lüpfegi Musig vo de Ländlerfründe Gantrischsee hei Tanzfroue vo dr Bärnische Trachtevereinigung ds Tanzbei gschwunge. Dr Gastkanton isch das Jahr Solothurn gsy. Dr Abe im Casino isch für üs Tanzfroue immer äs sehr schöns Erläbniss.

Dr Höhepunkt vo däm Jahr isch für üs Tanzfrouefroue z'Eigenössische Trachtefescht z'Schwyz gsy. Am Morge vom 4.Juni, bi wunderschönem Wätter hei sech Gurzeler Tanzfroue ufe Wäg richtig Schwyz gmacht. Wo mir z'Schwyz acho si, si mir aus erschts sehr gspannt uf üses Hotel gsy. Rächt abgläge u wit obe Schwyz hei mir üsi Ungerkunft im Baggasthuus Hand z'Rickenbach gfunge. Aes isch äs gmüätlechs u schön glägnigs Hotel gsy mit Sicht ufe Vierwaldstättersee. Dert si mir härzlech u fründlech empfangen worde. Nachem Zimmerbezieh, hei mir üs natürlech sofort ufe Wäg richtig Schwyz gmacht. Dert het äs ungloublech viu guät glunti Trachtelüt gha.

Am Anfang hei mit ar schwyzerischi Delegierteversammlung teilgno. Nachdäm isch z Fescht so richtig lanciert worde. Mir si verwöhnt worde mit feinem Aesse, guäter Ungerhautig, hei viu ufgsteuti Lüt troffe, hei unändlech viu glachet, hei am Tanzfescht am Samstinami teilgno u am Sunntig hei mir bim wunderschöne Umzug dörfe drbi si. Dert hei mir d'viefaut vo de verschiedene Trachte dörfe bestune.

Nachemne Abschiedskaffi hei mir üs am Abe vom 6. Juni müäd aber glücklech ufe heiwäg gmacht.

Das Trachtesfescht wird üs Tanzfroue immer i sehr schöner Erinnerung blibe.

Nit vergässe merci säge, möchte mir am Fritz Fahrni. Aer het für üs dr Taxidienst überno. Merci Fritz.

Ds Tanzleiterträffe am 31. Oktober z'Gümlige het us üser Gruppe d'Brigitta Grünig u z'Vreni Widmer bsuecht. Dert si sy ume viu neuie Tänz für üs ga lehre.

Bi dere Gläheheit möchte mir üs ou ume eis ganz hätzlech bim Vreni ur bir Brigitta bedanke. Mir schetzes sehr, dass di zwöi immer Zyt näh u d'Geduld hei, u mit üs auti Tänz ufrüsche u nöii Tänz istudiere.

I däm Vereinsjahr ha i ä schlimme Schicksausschlag müässe erläbe. I ha vor Gruppe ufeni so ifühusami u liebi Art dörfe gspühre dass dir aui für mi da sit u da drfür möchte ig euich aune ganz, ganz hätzlech merci säge. De das het mir so viu Kraft u Zueversicht gä! Danke viu mau, Silvia Beyeler.